


# CELEBRACIÓN EN OS COTOS (na casa)

7 – 8 de novembro do 2020

XXXII DO TEMPO ORDINARIO



NON MÁIS  
VIOLENCIA  
DE XÉNERO



OS COTOS COA IGUALDADE VERDADEIRA DAS PERSOAS,  
COS POBOS QUE SOFREN INJUSTIZA E ABANDONO,  
COS REFUXIADOS E MARXINADOS DA SOCIEDADE,  
COA NATUREZA MALTRATADA  
E CON RESPONSABILIDADE PERSOAL ANTE A COVID-19



## 1.- ENCONTRO EN FAMILIA

### SAÚDO DE BENVIDA

🎵 *Amigos nas penas*

**Celebrante:**

Benvidos sexamos todos a esta celebración. Reunímonos para compartir a fe en familia, e facémolo no nome do Pai e do Fillo e do Espírito Santo.

“Somos o que ti nos axudas a ser. Somos unha gran familia contigo” é o lema de hoxe: Día da igrexa diocesana.

No evanxeo Xesús vains contar unha parábola para que aprendamos a ser responsables, e na nosa Unidade Pastoral de Os Cotos levamos un tempo xa falando de responsabilidade persoal e de (familia) como obxectivo o conseguir.

Sería desexable que a celebración de hoxe nos fixera reflexionar sobre estes dous temas: Todos nós formamos unha gran familia na fe, somos cristiáns, membros dunha parroquia, dunha unidade pastoral, dunha diocese e da Igrexa de Xesús. E por iso mesmo, todos temos que ser responsables, dun xeito especial neste tempo de pandemia, persoalmente e uns dos outros.

Comecemos a celebración atentos á nosa responsabilidade persoal e social.

## ACTO PENITENCIAL E COMPROMISOS

**Celebrante:** *Para participar plenamente na celebración imos pedirlle perdón a Deus e aos irmáns polas moitas veces que non somos responsables e non facemos comunidade. Por iso agora queremos comprometer nos de verdade:*

### **Monitor/a**

➤ **Comprometémonos a vivir sendo responsables na nosa tarefa de ser familia?**

**SÍ, COMPROMETÉMONOS**

➤ **Comprometémonos a vivir sendo responsables na tarefa de ser comunidade parroquial?**

**SÍ, COMPROMETÉMONOS**

➤ **Comprometémonos a vivir sendo responsables na tarefa de facer realidade o evanxeo de Xesús?**

**SÍ, COMPROMETÉMONOS**

**Celebrante:** *Deus todopoderoso teña piedade de nós e dos que teñen lugar no noso corazón e nosa vida. A todos o Señor nos conceda o perdón e nos leve á vida eterna. Amén.*

## ORACIÓN PROPIA DO DÍA

**Celebrante:** *Presentámoslle ao Pai os nosos desexos para cumprir coas nosas responsabilidades con El e cos irmáns.*

*(silenzo)*

Deus, Noso Pai, cheo de tenrura e misericordia, alonxa de nós todo o que nos aparta de ti.

Dá nos liberdade para que poidamos dedicarnos libremente ao teu servizo, e sexamos capaces de asumir as responsabilidades da nosa vida e da nosa fe. Pedímoscho polo mesmo Xesucristo, Noso Señor. Amén

## 2.- PROCLAMACIÓN DA PALABRA DE DEUS

*(sentad@s)*

### **Monitor/a:**

*O Libro da Sabedoría invítanos a buscar e atopar a auténtica sabedoría para vivir.*

*Na parábola do Evanxeo, Xesús móstranos como temos que ser responsables persoalmente, pero tamén como todos temos que ser aceite e luz para os demais. Non podemos deixar de lado a ninguén, aínda que as veces nos parezan despreocupados do seu. Tamén a eles lles corresponde formar parte da nosa comunidade e por iso contamos con eles e tratamos de acollelos no medio de nós*

*Leccionario I A pág 277*

**Sab 6,12-16**

**LECTURA**

## LECTURA DO LIBRO DA SABEDORÍA

Raiolante e perenne é a Sabedoría  
e enxérgana sen dificultade os que a aman;  
déixase atopar dos que a procuran.

Adiántase a darse a coñecer polos que a anceian.

Quen madrugue por ela non ha de cansar:  
atoparaa chantada a carón da súa porta.

O matinar nela é xa o cumio da prudencia,  
quen por ela deixa o sono  
axiña se verá libre de preocupacións,  
pois ela de seu vai de acá para alá  
á procura dos que dela sexan dignos,  
aparéceselles benigna nos vieiros,  
sáelles ao encontro en calquera proxecto.

### Palabra do Señor

♪ *nº18 escoita ao Señor*

SALMO

(*en pé*) *Leccionario I A páx 279 Mt 25, 1-13 EVANXEO*

### PROCLAMACIÓN DO SANTO EVANXEO SEGUNDO MATEO

Daquela díxolles Xesús aos seus discípulos esta parábola:

O Reino dos Ceos parecerase a dez mociñas que,  
collendo os seus candís, saíron recibir o noivo. Cinco eran  
parvas e cinco asisadas. As parvas colleron os candís pero

non os encheron de aceite; as asisadas, en troques, cos  
candís levaron tamén as aceiteiras cheas. Como o noivo  
tardaba, pegoulles o sono, e botaron unha durmidela.

Alá pola media noite oíuse berrar: "¡Veña, que chega o  
noivo, ídeo recibir!"

Erguéronse todas aquelas mociñas e prepararon os  
candís. Entón díxéronlle as parvas ás asisadas: "Dádenos  
un chisco de aceite, que os nosos candís esmorecen".  
Responderon as asisadas: "Non vaia ser que non chegue  
para vós e para nós; mellor será que vaiades á tenda e que  
o merquedes".

No intre que elas ían mercalo, chegou o noivo, e as que  
estaban preparadas entraron con el no banquete de vodas,  
e pechouse a porta. Máis tarde chegaron as outras  
mociñas chamando: "¡Señor, Señor, ábrenos!" Pero el  
respondeulles: "Asegúrovos que non vos coñezo".

Vixiade, logo, xa que non sabedes nin o día nin a hora.

### Palabra do Señor

(*sentad@s*)

gardamos uns instantes de silencio para acoller  
a palabra no corazón





6

Cal é a nosa responsabilidade?:

- é RESPONSABILIDADE CRISTIÁ pois temos que facer crible o evanxeo de Xesús
- é RESPONSABILIDADE ECLESIAL pois na vida non imos sos e cada un para si, temos que camiñar facéndonos cribles como igrexa: na casa, na parroquia, na diocese,
- é RESPONSABILIDADE COIDADOSA con un mesmo e cos demais, sen facer diferenzas
- é RESPONSABILIDADE ECOLÓXICA porque coidar da natureza e da terra non o podemos deixar para mañá, é xa hoxe
- é RESPONSABILIDADE SOCIAL nesta pandemia

7

(en pé) **PROFESIÓN DA FE**  
**Celebrante:** Neste encontro familiar, queremos ser coherentes coa responsabilidade de vivir a fe e por iso dicimos:

***Creo, Señor, pero aumenta a miña fe***

***Monitor/a***

***Credes en Deus Pai e Nai,  
que sen facer diferenzas nos enche a todos do seu amor?***

***Creo, Señor, pero aumenta a miña fe***

***Credes en Xesús,  
que nos convida a ser responsables con nós mesmos, cos  
demais e coa natureza?***

***Creo, Señor, pero aumenta a miña fe***

***Credes no Espírito Santo  
que alenta a colaborar construíndo unha sociedade máis  
xusta e igualitaria?***

***Creo, Señor, pero aumenta a miña fe***

***Credes na igrexa,  
comunidade que necesita das nosas mans, dos nosos  
esforzos, para sermos cribles ao procurar irmandade e  
respecto para todos?***

***Creo, Señor, pero aumenta a miña fe***

8



## ORACIÓN UNIVERSAL

**Celebrante:** *Oremos xuntos, con confianza naquel que nos ensina a ser responsables e formar familia sen distinción de persoas. Dicimos:*

**Acolle, Señor, a nosa oración**

**Monitor/a**

- ✓ Pedimos Pai de bondade, pola nosa Diocese de Tui-Vigo, para que saiba transmitir con responsabilidade a mensaxe de Xesús, oremos
- ✓ Pedimos Pai de tenrura, para que nos esforcemos na crianza dos pequenos e mozos, de xeito que continúen a tarefa das nosas familias e parroquias, oremos
- ✓ Pedimos Pai de xustiza, para que esteamos alerta para descubrir que é o que axuda ao pobre e colaboremos en conseguilo, oremos
- ✓ Pedimos Pai de Xesús, para que asumamos responsablemente as esixencias do evanxeo nos nosos traballos, nas nosas casas, na nosa comunidade parroquial, oremos
- ✓ Polos enfermos e os que están a sufrir as consecuencias económicas da pandemia para que teñan o noso apoio e axuda responsable

**Celebrante:** *Escoita, Señor, a oración que a túa familia che presenta con humildade. Pedímoscho por Xesucristo noso Señor. Amén*

## 3.- OS SIGNOS DA COMUÑÓN CON DEUS EN FAMILIA

### NOSO PAI

**Celebrante:** *A Deus Pai presentámoslle agora a nosa oración como nos ensinou Xesús, por iso en familia lle dicimos:*

*NOSO PAI ...*

### SIGNO DA PAZ

**Celebrante:** *Nestes momentos de pandemia non podemos darnos a paz como quixéramos, pero si podemos ter un xesto ou unha mirada de aprecio para quen está máis preto de nós. Así mostramos o noso desexo de que teña paz no seu corazón e na súa vida.*

### NON COMULGAMOS

### PERO ESTAMOS EN COMUÑÓN

**Celebrante:** *Rezar xuntos é signo de que todos formamos unha mesma familia. Xesús comparte connosco o Evanxeo como signo do seu amor para con todos. Participemos hoxe nesta casa tratando de ser aceite e luz neste momento difícil. Ditosos nós que hoxe somos convidados a ser crentes e cribles.*

 **Acharte presente na vida**

#### 4.- AVISOS E DESPEDIDA

##### ORACIÓN FINAL

###### **Celebrante:**

Oremos: Señor, dámosche as grazas porque hoxe, como familia, podemos compartir os froitos da nosa fe.

Suplicámosche humildemente que nos enchas do teu espírito, para que a forza salvadora que nos comunicaches nos axude a medrar en coherencia co evanxeo.

Pedímoscho a Ti que vive e reina con nós por sempre eternamente. Amén

*Con Xesús queremos ter un trato acolledor, xusto e digno cos demais.*

*Con Xesús queremos asumir responsabilidades, aínda que hoxe teñamos que recoñecer que moitas veces formamos parte dunha sociedade que mira para outro lado e non as quere asumir.*

*Con Xesús queremos que a nosa comunidade de Os Cotos sexa sempre unha comunidade aberta, responsable e coidadora con todo e con todos.*

***Que teñamos un bo día, unha boa semana, e o Señor nos bendiga, † nos garde de todo mal e nos leve ao seu fogar de vida eterna. Amén.***



**"¡Señor, Señor, ábrenos!" Pero el respondeulles: "Asegúrovos que non vos coñezo".**

*Fagamos as cousas ben e con responsabilidade para que o Señor nos recoñeza nos nosos feitos.*